



De Chlause-Tee

De Samichlaus hed i sim Hüüsli allerlei parat gmacht für d' Bsüech bi de Chind, und d Schmutzli sind go luege, wie s im Dorf eso zue und här gaht.

Er isch richtig gschpannt gsi, was si alles verzellid, wenna hei chömid.

Aber er isch denn richtig verschrocke. De Oberschmutzli hed nämmlig gseit: «Samichlaus, es isch verrockt!»

«Im Dorf gots drunder und drüber. Niemer hed de Zit. D Lüt springed omenand, sind nervös, ja sogar hässig. Sie chaufed e Huufe Sache, aber niemer macht es zfrednigs Gesicht.»

«Mer händ denn denkt: Jetzt luegid mer bi de Chind, deet goods sicher andersch zue und her. Aber au d Chind händ gschritte mitenand, händ ned chönne lose, wemmer ne öppis gseit hed, und i de Lääde sind's vo eim Spilzүүgstand zum andere, und händ immer alles welle. Es isch richtig ungmütlich im Dorf. Mer händ chuum Lüt atrofte, wo mitenand gret händ oder zäme gsässe sind.»

De Samichlaus hed denn welle wösse: «Freued sich de d'Chind und die Erwachsene ned uf min Bsuech?»

Do hed de Oberschmutzli zur Antwort gä: «Sie wettet sich scho freue, aber sie wösse gar ned recht wie.»

Do hed de Samichlaus zu de Schmutzli gseit: «Es müessest doch öppis gä, wo's de Lüt so richtig warm wird um s Herz, wo's Gluscht überchömid, metenand i de Stobe z sitze, velecht e Gschicht z'verzelle, es Speeli z'mache oder eifach vor sich hee z'träume.»

De Samichlaus und d'Schmutzli händ denn überleid und überleid, und plötzlich hed de Samichlaus müesse schmunzle und hed zu de Schmutzli gseit:

«Ich glaub, ich ha d Löösig.»

D'Schmutzli händ ihn mit grosse Auge aaglugt und er hed ihne gseit: «Jo, was mached mer denn, wenn mer fertig gschaffed händ und s'richtig gmütlich wänd ha?»

Jetzt isch s au de Schmutzli klar gsi. I somene Moment choched si nämmlig es Chlause-Teeli und denn schmöckt's ganz fein. Mer hed richtig s'Gfüül, de Gruch verzauberi s ganze Hüüsli. Mängisch zöndids sogar e Cherze a dezue.

Denn isch s im Chlausehüüsli zue und hergange, wie imene Ameisihuufe. Sie händ sofort agfange, Chlause-Tee i Säckli abzfölle. Es isch allne klar gsi, wie si s'machid: Bi allne Bsüech händs i jedi Familie en Chlause-Tee metbroocht.

Dä händ d Lüt chönne choche, und wenna denn so fein gschmöckt hed und si de Tee trunke händ metenand, denn händs es richtig gmütlich gha.